

# Xujun xi tjun kits'inntu nda postru Pedro

## B'i ts'in kikjaniñaha Pedro xuta ninku

**1** An Pedro, an nda postruhu Jesucristo tít'sinkjínuu xujun jun xi j'ájinnuu Ntíaná. Jun xi kindzjoyo ante Ponto nga tinimasún, ko ante Galaciá ya, ante Capadociá, ante Asiá ko ante Bitiniá. <sup>2</sup>Kikie títjunnuu Ntía Na'miná, kui nga j'ájihinnuu ko Espirituhu kits'in jenuu, tu xi kuinú'yá'éhen ruu Jesucristo ko tu xi tu ngat'aha jníhi Jesucristo kjuáts'ehenuu Ntíaná.

Kas'e nkjánnuu kjuanda ko kjuajyu.

## B'i ts'in tsakúya Pedro ni xi ñá tjeñná nga kujichú nistjin xi fekuu

<sup>3</sup>Kan'etsjoho Ntíaná xi Ntíaha ko Na'mihí Nda Ntíaná Jesucristo. Ngat'aha kjuanimatak'un chánkaha kits'intsin tsetse ngáhaná nk'ie nga kits'ínkj'áíya ngáha ra Jesucristo ajihin xutak'ien. Kui nga tichuyáhaná nga kujntsuba tík'aán ko ñá <sup>4</sup>ko nga n'ekjáfihín ni xi tsjáná, ni xi najmi maha batsun ko najmi ma chuntí ko najmi maha 'meya, ni xi tjtjoho ndjiojmi ján ngandanuu. <sup>5</sup>Nga'yúhún Ntíaná tókunkohonuu tu ngat'aha nga s'ejinnuu. At'aha tjíndaha yjoho Ntíaná nga kuakúchji xi nkú ts'in ts'ínk'anki xuta xi ts'e nistjin xi fekuu.

<sup>6</sup>Kui kjuaha nga kitsejihinnuu kjuatsjo, ndaha tsa chuba nistjin tjihin nga n'e nibánnuu nkjin tíkjá ni xi kujtájiun. <sup>7</sup>Kui xi kuakúchji yáha jun nga kjuaxi. At'aha nga s'ejinnuu, kui xi 'yún chji saha ra nga toonsinee. Ndaha tsa maha batsun toonsinee, tunga chasehé ra tu xi s'ejña chjihi tsa kui kjuaxi. Ko nk'ie nga s'ejña chji xi nkú ts'in s'ejin kjuaxinuu, nda ts'in chubayanénuu ko sakúnuu kjuachánka ko nda k'úinnuu nistjin nga kj'uaíkáchji yjoho Jesucristo.

<sup>8</sup>Tjonuu Jesucristo, ndaha tsa najmi yo nkú tjin. Ko ndaha tsa najmi tíyo nd'ai, tunga s'ejihinnuu ko tjinnuu kjuatsjo xi tjihin kjuachánka, xi najmi yaá xi nkú ts'in bixíyaá. <sup>9</sup>Tjinnuu kui nii at'aha tísakúnuu nga tín'ek'ankinuu, kui xi nibáha ra ngat'aha nga s'ejinnuu.

<sup>10</sup>Já profeta xi kis'e nistjin nk'ie, xi kitsúya títjun kjuanda xi sakúnuu, kui xi kits'ínkjkink'un nga kama chubayahá xi nkú ts'ín k'uaŋkihi xuta, at'ahá mjehe skue kui ni. <sup>11</sup>Kama mjehe nga incha skue yá xutaha ko mí nistjihin xi y'ejña chji Espirituhu Cristo xi y'ejñajihin já profeta nga kitsúya títjuhun kju'un xi tjihin nga skue Cristo ko nga askahan s'e kjuachánka. <sup>12</sup>Tunga Ntíanáhá tsakúchjiji já profeta xu'bo nga ni xi tíncha tsuya najmi kui kamats'e, nga ní ngandanuu b'a kitsúhu. Kui niu xi ta kitsúyanuu já xi y'énijmínuu én nda tsuhu Jesucristo. Nga'yúhun Espiritu xi kin'e nibáha ndjiojmi ján y'énijmíhinuu. Ko ta ntítsjee mje nkjúhun nga skue nkú tjihin ra ni xu'bi.

### **B'i ts'ín tsakúya Pedro nga tintsuba ndaá at'ahá Ntíaná ja ts'ená**

<sup>13</sup>Kui b'a maha, chase sisihin ruu xi nkú n'oo. Nda n'enkjíntak'un ko chúya k'un'kuhúun kjuanda xi k'j'uaítsjánuu Jesucristo nistjin nga kuakúchji yjoho. <sup>14</sup>B'a n'oo xi nkú ts'ín ntí xi nt'é'én. Najmi ta n'ehenu xi nkú ts'ín kinchja animanuu nistjin nk'ie, nk'ie nga najmi kjee yo Ntíaná. <sup>15</sup>Tsje katumo nginkun Ntíaná, xi nkú ts'ín tsje xi j'ájinnuu. <sup>16</sup>At'ahá b'i ts'ín tjit'a éhen Ntíaná: “Tsje katumo, at'ahá tsjená.”

<sup>17</sup>Xihí “Na'mihí” bixíhuun xi ngúsuhún basehe tsa nda ko tsa najmi nda ni xi ts'ín nga nkúnkú xuta, kui nga kas'enuu kjuabinkjuhun xi nkú ts'ín kuankínkoo yjonuu nk'ie nga tinimasún so ei asuntee. <sup>18</sup>Yo nga kis'echjintjainuu tu xi kama ndáíhinuu nga chuba tintsubanú. B'a ts'ín tintsubo nk'ie at'ahá kui nihi xi y'ejñanuu ntje chánuu. Najmi toonsine ko tsa toontaba kin'echjén nga kis'echjintjainuu, ni xi maha batsun. <sup>19</sup>Jníhi ní Cristo kin'echjén, kui xi 'yún chjí. Xi nkúhu nku chutsanka kama Cristo, chutsanka xi najmi chumi nihi xi k'uhun ko xi najmi uhun.

<sup>20</sup>Kintehe ni nga kamanda asuntee kis'enda títjun ni xi ts'ín Cristo, ko nistjin feku xi kich'aá nd'ai j'aikúchji yjoho ngandanuu. <sup>21</sup>Ngat'ahá Cristo s'ejhinnuu Ntíaná, kui xi kits'ínk'jáíya ngáha ra Cristo ngabayoo ko kitsjáha kjuachánka. Kui nga tín'e s'ejhinnu ko tíma 'yún tak'uhunnu Ntíaná.

<sup>22</sup>Nd'ai ni nga ja kamaje animanuu at'ahá kinu'yá'óhoo én xi naxu tjin ko nga tu xí ndahá ts'ín tjiyanuu nga n'etjó xuta ninku, kui nga ngayjee animanuu n'etjohonu xinkiu. <sup>23</sup>At'ahá ja kitsin tsetse ngáhanu. Najmi kitsiun xi nkú ts'ín tsin xuta xi maha 'me. Éhen ní Ntíaná kits'intsin tsetse ngáhanuu. Kui xi fi ndju. Najmi kamaha kfe.

<sup>24</sup>At'ahá b'i ts'ín tjit'a xujun éhen Ntíaná:

Ngayjee xuta, xi nkú joyaha jñá xi tjin.

Ko ngayjee kjuachánkahá xuta,

xi nkú joyaha naxúhu jñó.

Xi jñoo ko jne naxuu,

<sup>25</sup> tunga éhen Ntiana santaha tu nkjéhé ni nguai ndju.

Kui éen, kui én nda tsu xi ja kis'enijmí ajinnuu.

**2** Kui b'a maha, n'e t'axihinnu ngayje kjuach'onk'un, ngayje ni tsank'á, kjuajohonkjin, kjuaxintak'un ko ngayje t'kjá kjuachubati'ain. <sup>2</sup>Katumo xi nkú joyaha ntínta xi mje nkjúhun ntáchiki. B'a ts'ín katuma mjenuu én xi ndoo. Kui xi tsjá nga'yúhun kjuankjintak'unnuu, tu xi b'a ts'ín saáhanu santaha nkúhu nga kjuáts'e sínnuu Ntiana. <sup>3</sup>Xihi jahá kichjut'o ngandaha Nda Ntiana.

### **B'i ts'ín tsakúya Pedro nga nku ndjo k'aku kits'ín ma Jesucristo nga y'éjña chubaya**

<sup>4</sup>Nibák'un tiñohoo Nda Ntiana, kui xi nkú joyaha nku ndjo xi t'jña t'k'un. Kikjaníya xuta ndjo xu'bo, tunga Ntiana há j'ájin ndjo ko nginkun Ntiana 'yún chj'hi ra. <sup>5</sup>Jun xi nkú joyaha ndjo xi t'jntu t'k'un, xi kin'endakoho nku n'inku xi najmi asuntee y'aha ra. Kin'e manuu já na'mi jehe Ntiana xi tsjáha chje Jesucristo, chje xi nk'a ján tjehe ra. A Ntiana há t'í'bohó kui chje nga b'a t'n'o, kui chje xi sasíhin Ntiana.

<sup>6</sup>At'aha b'i ts'ín t'jt'a xujun éhen Ntiana:  
An k'uejña nanki Sion nku ndjo k'aku,  
xi j'aján ko xi 'yún chj'.  
Ndahachí najmi sakúhu kjuasuba  
xuta xi s'ejihin ndjo.

<sup>7</sup>Ngat'a ts'ajun xi s'ejinnuu Nda Ntiana, chj'hi ra kui ndjo. Tungá xi najmi s'ejihin, bitjusun má nga b'i ts'ín t'jt'a xujun éhen Ntiana:

Ndjo xi kikjaníya já chj'inxjóo,  
kui xi ja j'ai ma ndjo k'aku.

<sup>8</sup>Ko b'i ta títsu ya:

Tsichu ma nku ndjo xi ts'ín saténki xuta,  
nku naxi xi ts'inxuntuhu.

Saténki xuta xu'bo ngat'aha éen, at'aha najmi nt'é'éhen éen. B'a maha xuta xu'bo at'aha ja b'a ts'ín t'jña nga b'a kamaha.

<sup>9</sup>Tunga máha jun, jun xi xuta xi kichj'ajin, jun já na'mi xi ts'inxát'aha xi batéxumaha nk'a ján, tsjenú jun xi xuta naxinantáha Ntiana, xuta xi ja tsichu ma ts'e Ntiana. B'a kin'e manuu tu xi kuxínyahanu xi nkú ts'ín chánka xi j'ájinuu. At'aha Ntiana j'ájinuu nga kuitjujiun má jyuun ko nga kuitjás'enjiun má nga ts'ín ndzjen kjuachánkaha. <sup>10</sup>Nistjin nk'ie, najmi xuta naxinantá kik'innuu, tunga nd'ai ja tsichumo xuta naxinantáha Ntiana. Ko nistjin nk'ie najmi kichase nimanuu, tunga nd'ai ja tichase nimanuu.

**B'i ts'ín tsakúya Pedro xi nkú ts'ín tjíhin nga  
kuankíkaá yjoná qjihin xuta xi tjín asuntei**

<sup>11</sup>Tjona jun, já nts'e. Tíbankinuu nga t'ech'óhoo yjonuu xi nkú ts'ín mjehe animanuu. At'aha kui nii, kui xi tífi kontranuu. Yo nga xin nankinuu ko tu tñimasúnnú ei asuntei. <sup>12</sup>Tu nku kixihí tankínkoo yjonuu qjihin xuta xi najmi be Ntíaná. B'a n'oo ndaha tsa b'a incha kuitsu nga najmi nda tñ'o. Tunga incha skuehé ni nda xi n'oo ko ts'íintsjoho Ntíaná nistjin nga kuanki kuenta.

<sup>13</sup>Ngat'aha nga Nda Ntíaná ts'enuu, kui nga chankjúhunnu ngayjee já xi tjíhin xá ei asuntei. B'a n'oo nginkun nda títjun k'aku Roma <sup>14</sup>ko b'a n'oo nginkun já k'aku xi b'éxá nda títjun k'aku nga ts'ínnijéhe xi ch'on ts'ín ko nga kjanínk'a xi nda ts'ín. <sup>15</sup>At'aha mjehe Ntíaná nga n'oo ni xi nda. B'a ts'ín k'úéchjahanu ts'a xuta xi najmi be Ntíaná ko najmi mankjihin ni xi ts'e.

<sup>16</sup>Ndaínuu yjonuu nginkun Ntíaná, tunga najmi tu n'echjénnú kjuandaínuu tsa k'uaíntohoo yjonuu nga n'oo ni xi najmi nda. Tu sa ní tñtsuboo xi nkú ts'ín b'entu xuta xi ts'ínxát'aha Ntíaná. <sup>17</sup>Chankjún ngayjee xuta. N'etjó xi ta Ntíhi Ntíaná. Chankjún Ntíaná. Nuú'yá'óhoo nda títjun k'aku Roma.

**B'i ts'ín títsuya Pedro ni xi tjíhin nga  
ts'ín xuta musu xi kich'atse**

<sup>18</sup>Jun xuta musu xi kich'atsenuu, chankjún já ntianuu ko nuú'yá'óhoo, najmi tu suba xi nda tjíyaha ko xi ma nimaha jun xi b'a n'ekoo. B'a ní ta n'ekoo xi kjan ts'ínkonuu. <sup>19</sup>At'aha nda nginkun Ntíaná nga ts'ín chúkjuá jámusu kjuá'un xi tíf'ajin, ndaha tsa najmi tjíhin nga kjuájin niu kai, tunga ts'ín chúkjuáhá at'aha ja kitsjáha yjoho Ntíaná. <sup>20</sup>Tunga tsa ch'on tñ'o ko tsa as'ai títs'ín'unnuu já ntianuu ko tñ'echjúkjuo, ¿mí ni chánkaha xi tñ'o ma? Tunga tsa nda tñ'o ko as'ai tñ'e chúkjuo kjuá'un xi tñbitjáiún, kuihí ni xu'bi xi nda nginkun Ntíaná.

<sup>21</sup>J'ájinnuu Ntíaná nga n'oo ni xi nda ko nga n'e chúkjuo ni xi tu kjuandahá kuitjáiun, xi nkú ta kits'ín Cristo nga un kiekehe ngandanuu. Y'éjña chubayanuu, tu xi b'a ta n'ehenu. <sup>22</sup>Najmi kits'ín ngatitsun ko najmi kik'anacha. <sup>23</sup>Nk'ie nga ch'on kik'ihin, najmi ch'on ts'ín kits'ínk'óya. Nk'ie nga un kiekehe, najmi b'a kitsú nga k'uasje chjí ni xi tñ'ehe. Tu sa ní aya ntsja Ntíaná y'éjñaya yjoho, at'aha kui xi kixi ts'ín kjuá.

<sup>24</sup>Kui kikjin kik'anji ngatitsunná nga kis'et'a kruu. B'a kits'ín tu xi kuayáha raá ngatitsun ko naxu n'eé nga kuíntsubáá. Ko tu ngat'aha nga kin'e'uhun Cristo, kui nga kin'enkihínuu. <sup>25</sup>Nistjin nk'ie xi nkú joyaha chutsanká xi ngji t'axín kamo, tunga nd'ai ja kik'óyak'un ngáhanu Nda bastuu, kui xi kunnuu.

**B'i ts'ín títsuya Pedro xi nkú ts'ín tjíhin nga  
k'úéntuko xinkjín xuta**

**3** Ko jun xi tí'minu jminchjín, chankjún x'innuu. B'a ts'ín ni xi n'ehenu ts'íhín nga s'ejihín Ntíaná x'innuu. Najmi ni xi chubo ts'ín nga s'ejihín x'innuu. <sup>2</sup>Skue xi nkú ts'ín naxu t'bankínko yjonuu ko nga t'yanjún Ntíaná.

<sup>3</sup>Najmi tu tsjo n'ek'íésunk'o yjonuu, tsa nihi xi nkjún ts'ín k'úéndo ntsjanuu ko tsa nihi xi nkjún ts'ín ngjúát'o toonsine ko tsa najyun xi 'yún chj'í ndyjo. <sup>4</sup>Tu sa ní ajin animanuu kas'e kjuatsjotjín xi najmi mahá feya, kui xi tsuhu ra nga nda kas'eyanuu ko najmi stinta. Kui ni xu'bj'í xi 'yún chj'íh'í ra nginkun Ntíaná.

<sup>5</sup>Nístjin nk'ie b'a ts'ín y'énda yjoho jminchjín je xi kis'e. Kui xi kama 'yún tak'un Ntíaná ko incha kikienkjún x'íhín. <sup>6</sup>Xi nkúhu Sara, kui xi kint'é'éhen Abraham ko “Chá Ntíaná” kitsúhu. Tsa ni xi nda n'ehenu ko najmi kuinkjún ni xi kamat'on, jun xi ntíh'í Sara b'a.

<sup>7</sup>Ko jun xi tí'minu jáx'in, n'enkjínk'un sisiun xi nkú ts'ín kuintsubakoo chjuánnuu. Chankjún at'ahá najmi ndjá t'fyahá xi nkúhu jun, ko at'ahá jun ko kui ta nja n'ek'jáinkohoo kjuandahá Ntíaná nga kuintsuba t'ík'un. B'a ts'ín tintsabakoo tu xi najmi chumi nihi xi k'uéchjahá ra nga chubakoo Ntíaná.

**B'i ts'ín tsakúya Pedro xi nkú ts'ín tjíhin nga kuintsubaá**

<sup>8</sup>Ko ni xi fekuhu, nda ts'ín tintsabakoo xinkiu. B'i ngján chase nimohoo ko n'etj'ó xinkiu at'ahá nts'o mahanu. N'e'yún tak'un xinkiu ko nimakjua katumo. <sup>9</sup>Najmi tu n'es'echj'íú tsa ch'on t'ín'enuu ko najmi tu én ch'on tsu n'ek'óyo tsa ch'on tí'minu. Tu sa ní chubantj'ó nginkun Ntíaná xi nkú títs'innuu, at'ahá tu xi nda ts'ínkohonu Ntíaná, kui nga kichj'ajihinnuu.

<sup>10</sup>At'ahá b'i títsu xujun éhen Ntíaná:

Xi mjehe ts'íintjo nístjin xi y'a,  
ko mjehe nga tsjo ts'ín kj'uhá nístjin,  
kui xi kat'éch'ohó njai én ch'on tsu,  
ko najmi tu katitju ts'a én tsank'á.

<sup>11</sup>Kats'ín t'axíhín yjoho kjuach'onk'uun,  
ko kats'ín ni xi nda.

Katangisjai kjuajyu ko kat'ejñajin.

<sup>12</sup>At'ahá Ntíaná basehe xuta xi naxu ts'ín,  
ko nda basínñjuhu ni xi 'mih'í nga chubako,  
tunga fi kontrahá ra xi ch'on ts'ín.

**B'i ts'ín tsakúya Pedro xi nkú ts'ín  
s'eyaná tsa kjuanima kuitjájian**

<sup>13</sup>Yá xi ch'on ts'íinnuu tsa ngayjehe k'un n'oo ni xi nda? <sup>14</sup>Á b'a nda tjíhin ts'ajun tsa nk'ie nga t'ín'o ni xi naxu t'ín t'íbitjájún

kjuanimá! Najmi tu binkjun xuta ko najmi tu nkjún manuu. <sup>15</sup>Tu sa ní chankjún Cristo ajin animanuu, at'aha kui xi Nda Ntianuu maha. Ko tintsuba ndo nga kamanuu k'úinyohoo xi nguásajaiyanuu ngat'a ts'e kjuanda xi tichuyóhoo.

<sup>16</sup>Tunga nimakjuahá n'esjo yjonuu ko chankjún jóo nga b'a n'oo. Najmi tu chumi ni chuba n'ek'anjiu yjonuu, tu xi nk'ie nga chubayanéhenuu kjuasuba kasakúhu ra xi tinchjatit'ainnuu ngat'aha xi nkú ts'ín naxu t'bankínkoo yjonuu nga yjankiu Cristo. <sup>17</sup>Tsa ni xi kjuanimá t'ibitjajihinnu, b'a katuma tsa Ntiana b'a ts'ín mjehe. Tunga ngat'aha ní nga nda t'n'o b'a katumanuu, najmi ngat'aha nga ch'on t'n'o.

<sup>18</sup>At'aha kui nihi xi ta j'ajin Cristo. Nkuhú niyá k'ien tu xi kits'ínndyajnuhu ngatitsuhun xuta. Xi naxu nginkun Ntiana un kiekehe ngandaha xi najmi naxu nginkun Ntiana. B'a kamaha tu xi ngjikohoná nginkun Ntiana. Kui xi ngat'a ts'e yjonintehe kin'ek'ien tunga ngat'a ts'ehé espirituhu kin'ekj'áiyaha. <sup>19</sup>Ko espiritu nk'ie nga ngjik'iénijmíhí xi ja k'ien xi kjintuyá'yún, <sup>20</sup>xi najmi kint'é'én nistjin nga y'ejña Noe nk'ie, kui nistjiun nga tsakúchji kjuatsentaha Ntiana nga kikuyá tsa nguajikj'áha ra animaha xuta nk'ie nga tít'sínnda tsutsu chánkoo Noe. Jin mahá xuta xi kits'ínk'ankihí ntóo nk'ie nga incha jas'en tsutsu chánkoo.

<sup>21</sup>Ntóo y'ejña chji títjun xi nkú ts'ín kits'ínk'ankinuu ntánijuo nk'ie nga saténtáa. Tunga nk'ie nga saténtána, n'ek'ankiná at'aha j'áiyaha Jesucristo ngabayoo. Najmi saténtáa tsa tu xi chjuxíhin kjuachuntíhi yjonintená. B'a ní n'ená tu xi t'binchisjáihiná nga je s'eyahaná nginkun Ntiana. <sup>22</sup>Ngjinji Jesucristo nk'a ján ko t'jñat'aha Ntiana. Nt'é'éhen ntítsjee, xi t'jín yaha xá ko xi batéxuma.

### B'i ts'ín tít'suya Pedro ni xi k'úéch'ooghó yjoná

**4** Tu ngat'aha nga un kiekehe Cristo nga kik'a yjoninnte, kui nga tjehe ruu yjonuu nga ta kui niu xi kjuajin. At'aha xuta xi ja j'ajin kjuanimá, kui xi ja y'ejña ngatitsuun. <sup>2</sup>B'a incha kits'ín tu xi nistjin xi k'ua saha najmi ta k'úéntuhu xi nkú ts'ín nchjaha animaha. K'úentu ní xi nkú ts'ín mjehe Ntiana. <sup>3</sup>Ja j'a xi nkú n'e tintsuoo nistjin nk'ie, nk'ie nga kin'o ni xi tsjoho xuta xi najmi be Ntiana, ko kik'aintohoo yjonuu nga kin'o tu mí nihí ni, ko kin'o ni xi nchjaha animanuu, ko kama ch'iu, ko kik'ohoo kjuatsjo animanuu, ko tu nku kjuatsjohó kama mjenuu, ko kiyankjún ntiá ch'onk'un xi ts'ínnda xuta.

<sup>4</sup>Xuta xu'bo najmi mankjihin á najmi ta n'ekohonu ni ch'onk'un xi tu ni xí jahá kits'ínkjas'ehen yjoho. Kui nga nd'ai ch'on ts'ín nchjayanehenuu. <sup>5</sup>Tunga t'jín ni nga ts'ínkjas'en kuenta nginkun Ntiana. Kui xi ja t'jindaha yjoho nga kuasehe mí nihi xi kits'ín nga nkúnkú xi t'jintu t'k'uun ko xi ja

k'ien. <sup>6</sup>Kui kjuaha nga ta kis'enijmíhi ra xi ja k'ien én nda tsuhu Ntíaná, tu xi k'úentu tík'uhun espírituhu xi nkú ts'ín mjehe Ntíaná, ndaha tsa ja kichasehe xi nkú ts'ín y'entu asuntee.

### **B'i ts'ín tsakúya Pedro nga nda n'exáka ni xi kitsjáná Ntíaná**

<sup>7</sup>Ja tábichú tiña nistjin nga n'ekje ngayjee ni xi tjin. Kui nga chase sinsihin ruu ni xi n'oo ko najmi tu n'ekj'áyo nga chubakoo Ntíaná. <sup>8</sup>Yún mjena nga n'etj'ó xinkiu, at'aha kjuatjoo nkjin nkjún ngatitsun ts'innidyajnu. <sup>9</sup>N'ekj'óhoon xinkiu ni'yanuu ko tsjo kat'enuu nga b'a n'oo.

<sup>10</sup>Xi nkú nga ts'ín xki kjuanda xi kin'ekj'óhoon nga nkúnkú, b'a ts'ín n'e chjónjihiin xinkiu kui niu. Ngandaha xinkiu katumachjén kjuandoo, at'aha tjihin nga nda n'e chjón nga nkúnkú kjuandaha Ntíaná xi kin'ekjas'ennuu. <sup>11</sup>Tsa tjin xi kuinchja, én xi títsjáha Ntíaná kui xi kanchja. Tsa tjin xi kuasinko xuta, katasinko xi nkú ts'ín tíjña nga'yún xi títsjáha Ntíaná. B'a ts'ín ajihin ngayjee ni xi n'oo sakúhu ra kjuachánka Ntíaná. B'a kama at'aha Jesucristo yjankiu. Kui xi kas'ehé kjuachánka ko nga'yún santaha tu nkjéhé ni. B'a katuma.

### **B'i ts'ín tsakúya Pedro xi nkú ts'ín ndjá kuinchajían ni xi ts'e Ntíaná**

<sup>12</sup>Tjona jun, já nts'e. Najmi tu katuma nkjúnnuu ni xi tímat'on nga ndjá tíchjut'ayák'unnuu, tsa b'a kamanuu tsa ni xi kj'ái kui nií. <sup>13</sup>Tu sa ní tsjo kat'enuu nga tísakút'anuu kjua'un, kjua'un xi ta j'ajin Cristo, tu xi 'yún tse katumaha kjuatsjonuu nistjin nga kama chji kjuachánkaha Cristo. <sup>14</sup>Tsa ch'on tí'minuu at'aha Cristo yjankiu, já b'a nda tjihin ts'ajun! At'aha Espirituhu Ntíaná tíjñajinnuu, Espiritu xi tjihin kjuachánka. <sup>15</sup>Tjin xi un behe at'aha animá ts'ínk'ien, ko tsa ndyjé ts'ín, ko tsa ch'on ts'ín, ko tsa chuba tsungijihín yjoho kjuá xi tjihin kj'ái xutaha, tunga najmi b'ahá katuma ajinnuu. <sup>16</sup>Tunga tsa tjin xi un tíbehe at'aha Cristo kits'ínkjas'ehe yjoho, najmi tu katuma subaha. Tu sa ní kats'ínsjoho Ntíaná at'aha Cristo tjenki.

<sup>17</sup>Ja chuba nga kuatuts'ihin ra Ntíaná nga kuasehe mí nihi xi ts'ín xuta. Xuta xi ts'e k'uaha ra. Tsa ña kuatuts'ínkohóná, ¿nkú sa ts'íhín xi najmi títs'ínkjáihín én nda tsuhu Ntíaná? <sup>18</sup>Tsa 'ni b'anki xi naxu ts'ín, ¿yá xi behe nkú k'úé ts'e xi najmi benkjún Ntíaná ko xi títs'ín ngatitsun? <sup>19</sup>Kui b'a maha, xi f'ajihin kjuanimá nk'ie nga Ntíaná títsjante, kats'ínkjas'en animaha aya ntsja xi kits'índaha, kui xi ma 'yún tak'aán, ko tu nkú ndahá kats'ín.

### **B'i ts'ín títsuya Pedro xi nkú ts'ín chasehe xuta ninkuhu Ntíaná**

**5** An xi ndachá ajihin xuta ninku. Tunkán kikiékohona kjuanimaha xi j'ajin Cristo ko ta an xi sakút'ana kjuachánka xi

s'ejña chji ndyjun nkiní. Tíbankihí jácháha xuta nínku xi tjin ajinnuu. <sup>2</sup>Chúhuun chutsankaha Ntíaná xi kin'ekjas'ennuu. Chaso<sub>hoo</sub>, tunga najmi tu chasehé ruu xi nkúhu tsa kjuá'yún tín'ehenuu. Ngayje níhi k'un chaso<sub>hoo</sub> xi nkú ts'ín mjehe Ntíaná. Kò ta ndaha tsa toon mjenuu, tsa kui kjuaha nga chaseheruu. Chaso níhi at'aha mjenuu nga chaso<sub>hoo</sub> xuta nínku.

<sup>3</sup>Najmi tu ndjá n'ekoo xuta xi kin'ekúnntanuu. Tu sa ní t'ejña chubayohoo xi nkú incha ts'ín xuta nínkuhu Ntíaná. <sup>4</sup>B'a ts'ín nk'ie nga kjuáíkúchjhi yjohò Nda bastu k'aku, n'ekjóhooon chjíhi kjuachánka xi najmi maha fe.

### **B'i ts'ín títsuya Pedro mí nihi xi chaseéhe nga kuintsubaá**

<sup>5</sup>Kò ta jun xi tí'minnuu já xunkú, tíbankinnuu nga chan<sub>kjún</sub> jácháha xuta nínku. Ngatento b'i ngján nímakjua n'esjo yjonuu nginkun xinkiu, at'aha b'i ts'ín tjt'a:

Ntíaná fi kontra<sub>ha</sub> xi ngak'un,  
tunga tsjáhá ra kjuanda xi nímakjua tjintuyáha.

<sup>6</sup>Kui nga n'e nímakjuahanu yjonuu kinte nga'yún chánkaha Ntíaná, tu xi kui k'uasjenk'ahanuu nk'ie nga kuichú chuba. <sup>7</sup>Ntíaná n'ekjas'ohoon ngayjee ni xi kjintahanuu, at'aha kui xi kjintaha ra jun.

<sup>8</sup>Chase chubayohoo ni xi n'oo kò tintsuba ndo, at'aha ndanindoo xi nda kontra<sub>nu</sub> maha. Tsú'ba xi nkú joyaha xa xi t'íb'éntsjí nga t'ibangisjai xuta xi kjine. <sup>9</sup>Tankín kontrohoo kò ndjá tinchajiun nga s'ejinnuu Ntíaná. At'aha yo nga ta kui kjuá'uhun xi títs'ín chúkjuá já nts'o xi tjin nga ngúshun asuntee.

<sup>10</sup>Nk'ie nga ja un kabennu chuba nistjin, Ntíaná kikjin, kui xi tsjáná ngayje tíkjá kjuanda, kui xi Cristo kits'ínchjén nga j'ájinná nga sakúná kjuachánkaha xi najmi maha feya, ts'ín nga kamo xi tjihin nga kamo, tsjá nga'yúnnuu, ndjá ts'ínkinchánuu kò najmi ta tsufi kuinchahanu. <sup>11</sup>Kui xi tu nkjéhe ni tjihin nga'yún. B'a katuma.

### **B'i ts'ín kits'ínkje Pedro xujuin**

<sup>12</sup>Silbano xi nda nts'é xihin, xi kixi fiko xáha, kui xi tsasinkona nga kits'inntá xujuin. Chubahá ni xi t'íbet'ánuu nga títsjaníyánuu kò tíxinya kixinnuu nk'ie nga ni xi tjt'a ei, kuihí xi kjuandaha Ntíaná. Ndjá tinchajiun kjuandoo.

<sup>13</sup>Títs'ínkjinuu kjuasuniña xuta nínku xi tjin ante Babilonia. Kui xi ta j'ájihin Ntíaná xi nkúhu jun. Ta títs'ínkjinuu kjuasuniña Marko, kui xi ntína xihin. <sup>14</sup>B'i ngján tsjo n'e súniñohoo xinkiu.

Kas'ennu kjuajyu ngatento jun xi tintsujihuun Cristo.